

A nombra comision pa celebracion di 26 aña den politica di Watty Vos



ORANJESTAD [AAN]
Celebracion en grande dia 28 di november dilanti residencia di Sr. Vos.

Den e ultimo simannan aki varios persona den nos comunidad a reuni pa asina hunto nan logra organisa un tremendo programa en conexion

cu 26 aña den politica.

Manera ya ta conoci pa e pueblo Arubano Sr. Watty Vos desde joven a drenta arena politica pa sea exacto den aña 1971. Sr. Vos despues di a gradua na MULO e la sa di logra tambe su diplomanan di adjunct commies y di

abogado. Watty tawata empleado di gobierno pa 34 aña y a tuma su retiro como tal na februari 1989.

Como empleado di gobierno Watty a cubri e posicion di sub hefe di e Departamento di Domeinbeheer. Desde e tempo ey caba Watty a sa di demostra su talento futbolistico. Sin duda Watty a participa den varios partido riba nivel local, inter-insular, y tambe internacional. Watty tabata hungador estelar bou di guia di e conocido entrenador Sr. Angel Botta. Watty a forma parti di equipo Aruba Juniors.

Tambe den e ramo di musica Watty tawata constantemente activo tanto como drummer y cantante. Watty tabata forma parti di e agrupacion di Los Duques y a sa di duna presentacion festivo den vario bario aki na Aruba.

Despues di a sera conoci cu necesidadnan y demandanan di e pueblo Arubano, Watty Vos a dicidi di drenta den arena politica y den prome salida na aña 1971, ela sa di wordu eligi cu votonan preferencial como miembro di eilandsraad.

Na aña 1973 mescos cu dos

aña anterior Watty a ser eligi cu gran cantidad di voto como mienbro di Staten di Antillas Hulandes. Na december di e mesun aña Watty ta bira Ministro di Justicia y Vice Promer Minister pa Antillas Hulandes.

Segun añanan tawata transcuri e popularidad di Watty a sigi crece y den nos proximo edicion nos lo elabora en extenso riba su exitonan, triunfonan y logronan. Watty tawata un persona clave den negociacionnan riba tereno di husticia, estructura estatal, delimitacion di awanan territorial di Aruba y Antillas Hulandes, reclutacion di candidatonan pa inspectornan pa polis, comision di reino, conferencia di mesa rondo y asina nos por sigi menciona.

Den e proximo dianan aki comision Pro Watty y Comitee organisatorio pa e gran celebracion di e 26 aña den politica di Watty Vos, lo sa di duna un rueda di prensa pa amplia mas riba e magno evento aki. Pa e anochi aki un programa a ser hinca den otro caminda lo ta bai tin diferente huesped invita, tanto di Aruba como paisnan vecino

caminda Watty a logra sera lasonan estrecho pa su pais natal. Tambe lo bai tin 4 banda grandi cu lo sa di hasi nan aparicion riba e escenaronan dilanti di e residencia di Watty Vos. Lo bai tin un bar y cushina bon surti, cu diferente cuminda, snacks y bebida.

Den cuadro di e gran celebracion aki un comite organisador a wordo institui cu ta consisti di personanan cu experiencia amplio pa loque ta trata magno eventonan.

Miembronan di e comite aki ta Sra. Tibizay Vos y Sra. Rosaura Semeleer, Srs. Ruben Garcia, Carlos Jacobs, Patrick Paskel, Juancho Werleman, Marco Marlin, Edward Vos, Jeffrey Matos, John Vos y Sr. Coby Alders. E comision aki ta ser presidi pa John Vos, Watty Vos mes lo aparece ariba escenario como tata di famia, politico y artista.

Comision Celebracion 26 aña den politica di Watty Vos lo den e proximo dianan aki lo cuminsa cu un documentacion amplio riba e 26 añanan aki, y tambe lo sigi informa e pueblo di Aruba en cuanto di e actividad aki.